

czweyn swystern Katherinen unnd Barbaran zcu lonn sollen darumbe, dasz sy der muter getrewlich unnd vlissigk gewart habin.

Auch ist beredt, sturbe dy muter, ee sy iren dryttenteil vorczert, so sal der obgemelte acgker unnd wysze an eintrag keynem geswyster, menner ader ffrauen, erbnemen ader erbennemern, der allein der czweyn swysteren Katherinen unnd Barbaran, dorein wir denne alle eintrechtlichen gewillet unnd gekurt haben, also dasz sy, veil dy müter lebet, nirgenth her wenden noch vorczeren, vorkauffen, noch an weren vorphenden. Auch sollin dy czwüe svysteren mit der muter uff gelichen teil den nuctz desz acgkirsz unnd weszin in nemen unnd ein bestellin zcu acgkern uff glichen phenning, veil dy muter lebet.

Auch ist beteidiget, erlebet dy müter dy czeit, dasz sy iren drittenteyl vorczert unnd auch den acgker unnd wesze in der aüwe wasz uff dy czehen ß gr, so habin wir geswystere unnd auch ir menner unnd der herr mit sampt seyner brüdern gelobet unnd geredt vor den obgescribin erksam menner zcusammen zcu legin unnd geben yczlichs noch seyner anczal unnd dy vorgemelte unnsrerir muter neren mit eyner mait, dy veil sy lebet.

Des allisz zcu eyner warhafftigen kuntschafft unnd meher sicherheit, so haben wir alle eintrechtlichen allesempflichen, dy dy sache belannget, gepeten ein sulchs in der stadt buch zcu screiben.

Ausz sülcher vorvillung unnd vortracht hat Matthes Morgenstern ein sunderlichen uszczog genummen, wer es sache, dasz om sein elich wirten von todis wegen ee abeinge, wenne ir muter, dy Waltherin, zo vil sich Morgenstern ausz solcher vorvillung unnd kore gancz uszgeczogin habe (!) unnd forder gancz entsprochen unnd forder insprach zcu haben in der gnantin ffrauwn drittenteil ader gütern vy fil ir bliben.

a) folgt durchgestrichen lange b) Wortwiederholung

1064.

1463 Mai 21

Frau Rudenitz und ihre Kinder verkaufen ein Haus.

fol. 202v Item ist gescheen am sonabendt noch unnszirs Herrn hymmelfart, dasz ist kommen vor ein rath dy Rudeniczzerin mit iren mundigin kindern Peter, Jocoff, Bartel Rudenicz unnd haben sempflichen geredt unnd gelobt Andersz Schurczuff zcu geweren sulchs husz, dasz er on abegkaufft hat, on unnd synen erben unnd dy zcu geweren, auch vor dy unmundigen kinder Paul, Margaretha, Elisabeth Rudenicz vorlaszenen unmundigen erbin unnd verpurgin, dasz mit allen iren gutern an allisz geferde unnde argelist vor ydermenniglichen. Actum coram proconsule et sociorum anno LXIII^o.